

12. april 2016

**Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaata allannguuteqarnitinnissaa pillugu Inatsisartut inatsisaat nr. Xx, xx. Xxxx 2016-imeersoq pillugu siunnersuut. (Aallarnisaasunik ineriartortitsinermik ingerlataqarnermut tapersiisarneq)**

(Inuussutissarsiornermut, Suliffeqarnermut Niuernermut Nunanullu Allanut Naalakkersuisoq)

Inuussutissarsiornikkut isumassarsisut namminersortuullutillu ingerlataqarusuttut pitsaasumik aallartisarnissaat pingaaruteqarpoq. Nunatsinni inuussutissarsiutinik aallarnisaaneq nunanut allanut sanilliullugu arlalitsigut immikkuulluarissumik inissisimavoq, taamaattumik ingerlaavartumik aporfusartut takullugit naleqqusaajuarnissaq pisariaqarpoq.

Nuna angisooq siammasissunik illoqarfeqarlunilu inoqarfeqartoq tassaavoq Siumup pilersinneqarnerminiilli tunngavimmigut pingaartillugu aningaasarsiornikkut kivitseqatigiiffiusumik ingerlatsivigisaa, taamaattumik siammasissumik inooriaaseqarnitta pisariaqartippaa inuussutissarsiutaasinnaasunik nutaanik aallarnisaasut nunatsinnut tulluusakkamik naleqqusaajuarnikkut nukittuumik tunngavilerlugit tapersersornissaat.

Maluginiagassaavoq 2014-imi aallarnisaasunut kittaartakkat 49-it tunniunneqarsimmata ukiorlu kingulleq 2015-imi 33-it tunniunneqarsimallutik. Tusarniaanerni akissutigineqartuni oqaatigineqarpoq Greenland Business A/S-imut aningaasaliissutigineqartartut tamakkiisumik atorneqarneq ajortut. Aningaasat pioreersut atorlugit aallarnisaasunut ineriartortitsinissaq pitsanngorsarneqarsissaa ingerlanniarneqarpoq taamaalilluni aningaasaliissutit sapinngisamik tamakkiisumik atorluarneqarsinnaasammata.

Pingaaruteqarpoq aningaasaliissutit sapinngisamik nunatsinnut kommuuninut tamanut siammasissumik atorneqarnissaat, tamatumalu periarfissaanera kommuuninut innuttaasunullu qaammar-saassutigiuarnissaat kaammattuutigissavarput taamaasilluni nunamut tamarmut inuussutissarsiutinik aallarnisaasut periarfissaat siammasissumik nukittorsarneqarsinnaasammata.

Avataaniit eqqussukkat amerlapput, aammali nunatsinni inuussutissarsiutit pioreersut inerisartuarnissaat pisariaqarpoq, taamaaliornikkummi nunatsinni aningaasat kaaviaartinneqarnerinut atorluannerusinnaagatta, inuussutissarsiornikkut isummat nutaat nunatsinnut tulluarsakkanik ingerlatsiniartut atorluarnissaanut. Inuussutissarsiutaasinnaasut nutaat ineriartornissaanut naammassisaqarsinnaassusaanullu pitsaanagerusumik aqutissiuinissaq ingerlaavartumik pisariaqarpoq, tamannalu anguniarneqarmat Siumumiit iluarisimaarparput.

Nunatsinni innuttaasut ikitsunnguugatta nunarujussuarmik siammasissumik najugaqarnitta kingunerisaanik inuussutissarsiornikkut akilersinnaasumik ingerlatsiniarneq ajornakusoortarpoq, taamaattumik pisariaqarluinnarpoq piareersarluarluni pilersaarusiolarualluni timitalersuinissaq, taamaaliornikkut aallarnisaasut iluatittut amerlanerusut ingerlasinnaanissaat anguneqarsinnaasammat.

Inatsimmi allannguutissatut siunnersuumi aallarnisaasut ineriartortitsinermik ingerlataqartut peqatiminnut assingusumik inissisimasunut immersoqatigiittalernissaat, isumasioqatigiittalernissaat,

pikkorissartalernissaallu aqutissiorniartoq pitsaasutut isigaarput, taamaasilluni aallarnisaasut nukit-tunerusumik piviusunngortitsisinnaasammata.

Aallarnissaanermi pikkorissarnissaq pisariaqarsinnaasarpoq assersuutigalugu pilersaarusionermut, aningaasarsiornermut, niuernermit il.il., tamanna qaammatit 24-it ingerlanerini sisamariaq periarfissaalissamat pitsaasutut Siumumiit isigaarput.

Maluginiagassat ilagaat aallarnisaasut isumassarsiamik peqartut tassaatinneqarmata suliffeqarfittut nalunaarsortinneqanngitsut, nalunaarsortittoqarsimassappallu aallartinnermiit qaammatini 12-ini sivikinnerusumik nalunaarsortissamasariaqarpoq.

Taamaamat Siumumiit ataatsimut isigalugu inatsisissatut allannguutissatut siunnersuut taperserparput, aappassaaniinnginneranilu Inuussutissarsiornermut, Suliffeqarnermullu ataatsimiititaliamut innersuullugu.

Suka K. Frederiksen

Siumut